



SAOPĆENJE ZA JAVNOST

Revidiran Plan rješavanja predmeta ratnih zločina Po poznatom počiniocu ostao neriješen samo jedan predmet (Brčko, 24.7.2024. godine)

U skladu s revidiranom državnom strategijom iz 2020. godine, Tužilaštvo Brčko distrikta BiH podnijelo je Visokom sudskom i tužilačkom vijeću BiH revidirani Plan za rješavanja predmeta ratnih zločina za ovu godinu, kao i polugodišnji izvještaj o rješavanju ove vrste predmeta za prvo polugodište tekuće godine. Revidirani Plan odnosi se na predmete u fazi istrage, pri čemu je od početka planskog perioda planirano rješavanje jednog predmeta po poznatom i jednog predmeta po nepoznatom počiniocu. Do ovog trenutka, ovaj planski dokument, koji u pogledu ciljeva prati revidiranu državnu strategiju, realiziran je u procentu od 50%, budući da je riješena jedna od planiranih istraga po poznatom učiniocu. Tako je u ovoj vrsti predmeta ostao neriješen samo jedan predmet u kojem je osumnjičeni nedostupan, a za kim je usljed toga raspisana međunarodna potjernica.

Posmatrano po svim vrstama upisa, pred ovim tužilaštvom ukupno je u radu 78 predmeta ratnih zločina. Na nivou ovog tužilaštva u radu su istražni predmeti manje složenosti, od kojih se prioritarno rješavaju istrage po poznatom osumnjičenom (KTRZ), dok se intenzivno radi i na rješavanju slučajeva po nepoznatom počiniocu (KTNRZ). Rekapitulacija neriješenih predmeta ratnih zločina pokazuje da ovo tužilaštvo nema neriješenih predmeta u fazi prijave po poznatom počiniocu, dok je u fazi istrage ostao neriješen samo jedan predmet, i to s međunarodnom potjernicom. S druge strane, po nepoznatom počiniocu, u fazi KTNRZ istrage, neriješeno je ostalo ukupno 75 predmeta, od kojih je njih 46 ustupljeno od Tužilaštva BiH, među kojima su i četiri nova predmeta dostavljena na nadležnost u tekućoj godini. Glavni razlog nerješavanja ove vrste predmeta vezuje se za nemogućnost otkrivanja počinioca krivičnog djela ratnog zločina.

U suđenju pred Osnovnim sudom Distrikta dva predmeta se nalaze u fazi glavnog pretresa, protiv Željka Slijepčevića i Senada Pekića, oba zbog krivičnog djela Ratni zločin protiv civilnog stanovništva. I dok je zbog bolesti optuženog postupak protiv Slijepčevića odgođen na neodređeno vrijeme, po optužnici protiv Pekića iz prošle godine Tužilaštvo pred sudom aktivno izvodi dokaze optužbe. U periodu najintenzivnijeg rada na predmetima ratnih zločina, od 2004. g. do 2014. g, Tužilaštvo Distrikta procesuiralo je svih četrnaest osoba iz predmeta kojima je Međunarodni krivični tribunal za bivšu Jugoslaviju u Hagu dodijelio A oznaku složenosti. Šestoro njih je u Brčkom pravosnažno osuđeno na ukupno trideset i jednu godinu zatvora. Procesuiranje tri osobe ustupljeno je Tužilaštvu Bosne i Hercegovine, a za jednu od njih krivično gonjenje s ove instance proslijeđeno je Tužilaštvu za ratne zločine Republike Srbije. Usto, pravosuđu te zemlje Tužilaštvo Distrikta ustupilo je procesuiranje jedne osobe.

Revidirana državna strategija za rad na predmetima ratnih zločina usvojena je 2020. g. s ciljem da unaprijedi procesuiranje predmeta ratnih zločina pred domaćim sudovima i tužilaštvima, posebno kroz odgovarajuću raspodjelu predmeta između pravosuđa na nivou BiH, entiteta i distrikta Brčko. Aneksom B Strategije predviđeno je efikasnije procesuiranje najsloženijih predmeta, među kojima su prije svih predmeti protiv lica s A-liste Pravila puta, odnosno predmeti s ranijom standardnom haškom oznakom A.

**GLAVNI TUŽILAC
ZEKERIJA MUJKANOVIĆ**